

官常典第一百四十二卷

勳爵部彙考十四

商 豕韋氏

商滅豕韋氏復以劉累之後代之 按左傳襄公二十四年晉范宣子曰昔句之祖自虞以上爲陶唐氏在夏爲御龍氏在商爲豕韋氏在周爲唐杜氏晉主夏盟爲范氏

注

御龍氏劉累也豕韋國

名唐杜二國名殷末豕韋國於唐周成王滅唐遷之於杜爲杜伯

疏

正義曰鄭語云祝融之後八

姓大彭豕韋爲商伯矣又曰彭姓彭祖豕韋則商滅之矣賈逵云大彭豕韋爲商伯其後世失道

殷德復興而滅之然則商之初豕韋國君爲彭姓也其後乃以劉累之後代之亦不知殷之何王滅彭姓而封累後也昭二十九年傳稱夏王孔甲嘉劉累賜氏曰御龍以更豕韋之後賜劉累身封豕韋而此云在商爲豕韋氏者杜於彼註云劉累代彭姓之豕韋累尋遷魯縣豕韋復國至商而滅累之後世復承其國爲豕韋氏是杜解劉累及其後世再封豕韋之事

昭公二十九年晉蔡墨對魏獻子曰昔有飈叔安有裔子曰董父實甚好龍能求其耆欲以飲食之

龍多歸之乃擾畜龍以服事帝舜帝賜之姓曰董氏曰豢龍封諸鬲川鬲夷氏其後也故帝舜世有畜龍及有夏孔甲擾於有帝帝賜之乘龍河漢各二各有雌雄孔甲不能食而未獲豢龍氏陶唐氏既衰其後有劉累學擾龍於豢龍氏以事孔甲能飲食之夏后嘉之賜氏曰御龍以更豕韋之後龍一雌死潛醢以食夏后夏后饗之既而使求之懼而遷於魯縣范氏其後也

注

以劉累代彭姓之

豕韋累尋遷魯縣豕韋復國至商而滅累之後世復承其國爲豕韋氏在襄二十四年不能致龍故懼遷魯縣自貶退也

疏

正義曰傳言以更豕韋之後則豕韋是舊國廢其君以劉累代之鄭語

云祝融之後八姓大彭豕韋爲商伯矣又云彭姓彭祖豕韋則商滅之矣如彼文豕韋之國至商乃滅於夏王孔甲之時彭姓豕韋未全滅也又下云劉累懼而遷於魯縣明是累遷之後豕韋復國至商乃滅耳襄二十四年傳范宣子自言其祖在夏爲御龍氏在商爲豕韋氏則劉累子孫復封豕韋杜跡其事知累後世更復其國爲豕韋氏也

按路史帝堯陶唐氏取富宜氏曰皇生朱庶弟九其封於留者爲留氏後有留累以豢龍事夏引甲賜之氏曰御龍以更颺董之後既遷於魯商居大夏爲唐氏御氏擾龍氏至周封帝後於鑄鑄

祝是分侯於隨爲鑄氏祝氏隨氏既更累之裔於方城爲唐公楚併唐其徙杜者爲杜氏唐杜氏屠氏唐孫氏李氏

遂

商封舜後於遂 按左傳昭公三年晏子曰箕伯直柄虞遂伯戲其相胡公大姬已在齊矣

注四

人皆舜後陳氏之先

昭公八年史趙對晉侯曰自幕至於瞽瞍無違命舜重之以明德寘德於遂遂世守之及胡公不淫故周賜之姓使祀虞帝

注

遂舜後蓋殷之興存舜之後而封遂言舜德乃至於遂

疏

三年傳云箕

伯直柄虞遂伯戲則遂在直柄之後故云蓋殷興存舜之後而封之也

按路史遂舜裔也夏之世有箕伯直柄伯戲中衰成湯寘之於遂遂世守之後爲齊所滅

注莊公

十二年齊桓滅之左氏正義及風俗通云商封之於遂

周僖王元年夏六月齊人滅遂 按春秋莊公十三年 按左傳十三年春會於北杏以平宋亂遂

人不至夏齊人滅遂而戍之

注

遂國在濟北蛇丘縣東北舜之後

僖王四年夏齊人殲於遂 按春秋莊公十七年 按左傳十七年夏遂因氏領氏工婁氏須遂氏

饗齊戍醉而殺之齊人殲焉

注

饗酒食也四族遂之疆宗齊滅遂戍之在十三年

按路史主胡負遂廬蒲衛甄潘饒番鄒息有何母轅餘姚上虞濮陽餘虞西虞亡錫巴陵衡山長

沙皆舜裔也

按諸國有封代及事蹟可攷者皆已分列餘多不可攷姑附于此

九

帝辛元年命九侯 按竹書紀年云云

帝辛醢九侯

按禮記明堂位昔殷紂亂天下脯鬼侯以饗諸侯是以周公相武王以伐紂

按史記殷本紀紂以西伯昌九侯鄂侯爲三公九侯有好女入之紂九侯女不意淫紂怒殺之而醢

九侯鄂侯爭之疆辨之疾并脯鄂侯西伯昌聞之竊嘆崇侯虎知之以告紂紂囚西伯羑里

注徐

廣曰一作鬼侯鄴縣有九侯城索隱曰九亦依字讀鄒誕生音仇也正義曰括地志云相州洛陽

縣西南五十里有九侯城亦名鬼侯城蓋殷時九侯城也

鄂

按鄂各爲一國西伯以脯鄂侯致歎何至敗者之明年遂伐之玩二紀自明

帝辛脯鄂侯

按史記殷本紀紂以西伯昌九侯鄂侯爲三公九侯有好女入之紂九侯女不慮淫

紂怒殺之而醢九侯鄂侯爭之彊辨之疾并脯鄂侯西伯昌聞之竊嘆崇侯虎知之以告紂紂囚西

伯羗里

注

徐廣曰鄂一作邛音于野王縣有邛城

按周本紀西伯敗耆國殷之祖伊聞之懼以告帝紂紂曰不有天命乎是何能爲明年伐邛

注徐

廣曰邛城在野王縣西北音于

按竹書紀年帝辛三十四年周師取耆及邛

姚

商有姚國

按左傳昭公元年趙孟曰商有姚邳

注姚商諸侯

帝外壬元祀姚人叛

按竹書紀年云云

帝河亶甲五祀姚人來賓

按竹書紀年姚人入于班方彭伯韋伯伐班方姚人來賓

程

商封和氏於程

按汲冢周書爵重祿輕比

闕

不成者亡昔有畢程氏損祿增爵羣臣貌匱比而戾

民畢程氏以亡

按路史帝顓頊高陽氏姬姓取勝奔氏曰嫫生伯稱卷章季禹三人卷章取梃水氏曰嬌生犁及回犁爲祝融生長琴及噎噎處西極以行日月太子長琴居於搖山實始樂風犁卒帝嚳以回代之帝摯之世九犁亂時重犁失職堯於是復育重犁之後使復舊業是爲羲和和實爲犁後爲和氏商封之程有程氏司馬氏

注

周宣王時程伯休父爲宣王司馬掌六師伐徐爲氏

帝武乙二十四年周師伐程戰於畢克之

按竹書紀年云云

郝

帝乙封郝骨之後於郝 按路史太昊伏羲氏之弟郝骨氏爲帝立制其裔孫子期帝乙封之太原之郝

辛

商有辛國周文王以辛甲諫紂封之長子 按路史禹之支子或封於辛辛甲事紂七十五諫不從文王以爲史封之長子昭王南征辛繇靡爲御右拯王而俱溺封其子西翟

周穆王元年命辛伯餘靡 按竹書紀年穆王元年己未春正月王卽位昨昭公命辛伯餘靡

莊王四年王及辛伯殺周公黑肩 按春秋不書 按左傳桓公十八年秋七月周公欲弑莊王而

立王子克辛伯告王遂與王殺周公黑肩王子克奔燕初子儀有寵於桓王桓王屬諸周公辛伯諫

曰並后匹嫡兩政耦國亂之本也周公弗從故及 按史記周本紀莊王四年周公黑肩欲殺莊

王而立王子克辛伯告王王殺周公王子克奔燕

襄王十四年夏辛有適伊川 按春秋不書 按左傳僖公二十二年夏辛有適伊川見被髮而祭

於野者曰不及百年此其戎乎其禮先亡矣秋秦晉遷陸渾之戎於伊川

密須

帝辛十六祀西伯伐密須 按詩經大雅帝謂文王無然畔援無然歆羨誕先登于岸密人不恭敢

拒大邦侵阮徂共王赫斯怒爰整其旅以按徂旅以篤周祜以對于天下依其在京侵自阮疆陟我

高岡無矢我陵我陵我阿無飲我泉我泉我池度其鮮原居岐之陽在渭之將萬邦之方下民之王

朱密密須氏也姑姓之國阮國名文王從阮疆而出以侵密於是相其高原而徙都焉所謂程邑

也

按史記周本紀西伯伐密須

注

應劭曰密須氏姑姓之國瓚曰安定陰密縣是

按路史黃帝有熊氏子二十五別姓者十二祈酉滕箴任荀釐結偃依及二紀也餘循姬姓結姓伯
僚封於南燕密須闕允蔡光敦偃燕魯離斷密雖結分也

注

荀史記作荀

黃帝應代有風后爲之相因八卦說九宮以安營壘次定萬民之寢黃帝滅蚩尤徽猷多本於后尤
北復以其輕勦其餘於輶谷人賴其利遂世祀之是爲金山之神謬封其後於任錫之己姓黃帝之
孫任己實歸其在唐虞俱有封土書缺不見夏后氏之初封之庖爲姁姓遜周之興武王復其後於
宿後有密宿須句顓臾邑於涕上實典太昊之祀以爲東蒙主是以季氏將伐顓臾而孔子傷之須
句後爲侏所併魯復取之而宿之後則興於宋俱不復見

按通鑑前編商王紂立十有六祀西伯伐密須

目

通志曰初文王問太公孰可伐太公曰密須管

叔曰其君強明伐之不可太公曰先王伐逆不伐順伐險不伐易遂自阮徂共而及密須密須之

人自縛其君而歸

周恭王四年滅密 按國語恭王游於涇上密康公從有三女奔之其母曰必致之於王夫獸三爲

羣人三爲衆女三爲粲王田不取羣公行下衆王御不參一族夫粲美之物也衆以美物歸女而何德以堪之王猶不堪況爾小醜小醜備物終必亡康公弗獻一年王滅密 按史記周本紀注韋

昭曰康公密國之君姬姓也正義曰括地志云陰密故城在涇州鶉孤縣西東接縣城故密國也

黎

帝辛三十一祀西伯戡黎 按書經西伯戡黎西伯既戡黎祖伊恐奔告于王曰天子天既訖我殷

命格人元龜罔敢知吉非先王不相我後人惟王淫戲用自絕故天棄我不有康食不虞天性不迪率典今我民罔弗欲喪曰天曷不降威大命不摯今王其如台王曰嗚呼我生不有命在天祖伊反曰嗚呼乃罪多參在上乃能責命于天殷之卽喪指乃功不無戮于爾邦 注正義曰黎國漢之上

黨郡壺關所治黎亭是也紂都朝歌王圻千里黎在朝歌之西故爲近王圻之諸侯也

按路史黎子國也西伯戡黎武王復以封湯後 按通鑑前編帝辛三十有一祀周西伯東觀兵戡

黎 目大紀曰先是亳有雀生鵲史占之曰以小生大威振名昌紂愈輕肆棄耆舊貴戚大臣商容

微子微仲箕子比干膠鬲之徒不用而用蜚廉惡來蜚廉者孟獻仲衍之裔孫惡來其子也俱以材力進善諛好佞賢臣梅伯性忠直數諫諍紂怒殺而醢之有雷開者阿佞進諛言紂賜金玉而封之賞以夏田或諫曰非時也君踐一日之苗而民失終歲之食其可乎殺之圍囿汙池沛澤多而虎豹犀象生焉夷羊在牧蜚鴻滿野山鳴河竭天雨肉雨石兩日見龜生毛兔有角女子化爲丈夫宮中夜聞哭聲而不見其人黎侯近於王畿不恭王命紂方日夜極意聲色不知治也西伯發戡黎殷人大震

周定王十三年秋七月晉師略狄立黎侯 按詩經邶風式微篇式微式微胡不歸微君之故胡爲乎中露式微式微胡不歸微君之躬胡爲乎泥中 序式微黎侯寓於衛其臣勸以歸也 黎侯爲

狄人所逐棄其國而寄於衛衛處之以二邑因安之故其臣勸之 疏經云中露泥中知處之以二

邑

按詩經旄丘篇旄丘之葛兮何誕之節兮叔兮伯兮何多日也何其處也必有與也何其久也必有以也狐裘蒙戎匪車不東叔兮伯兮靡所與同瑱兮尾兮流離之子叔兮伯兮褻如充耳

朱舊說

黎之臣子自言久寓於衛

按春秋不書 按左傳宣公十五年秋七月壬午晉侯治兵於稷以略狄土立黎侯而還

逢

商有逢國 按左傳昭公十年春正月有星出於婺女鄭裨竈言於子產曰七月戊子晉君將死今

茲歲在顓頊之虛姜氏任氏實守其地居其維首而有妖星焉告邑姜也邑姜晉之妣也天以七紀

戊子逢公以登星斯於是乎出吾是以譏之

注

逢公殷諸侯居齊地者逢公將死妖星出婺女

按左傳昭公二十年冬十二月齊侯田於沛至自田晏子侍於罍臺飲酒樂公曰古而無死其樂若

何晏子對曰古而無死則古之樂也君何得焉昔爽鳩氏始居此地季荊因之有逢伯陵因之蒲姑

氏因之而後太公因之古者無死爽鳩氏之樂非君所願也

注

逢伯陵殷諸侯姜姓

按路史炎帝戲生器器生鉅及伯陵祝庸伯陵爲黃帝臣封逢實始於齊

周穆王十二年毛公班共公利逢公固帥師從王伐犬戎 按竹書紀年云云

芮

帝辛十四祀虞芮質成於周

按史記周本紀西伯陰行善諸侯皆來決平於是虞芮之人有獄不

能決乃如周入界耕者皆讓畔民俗皆讓長虞芮之人未見西伯皆慙相謂曰吾所爭周人所恥何

往爲祇取辱耳遂還俱讓而去

注

地理志虞在河東太陽縣芮在馮翊臨晉縣界正義曰括地志

云故虞城在陝州河北縣東北五十里虞山之上古虞國也故芮城縣西二十里古芮國也晉太

康地記云虞西百四十里有芮城括地志云又閼原在河北縣西六十五里詩云虞芮質厥成毛

萁云虞芮之君相與爭里久而不平乃相謂曰西伯仁人盍往質焉乃相與朝周二國君相謂曰

我等小人不可履君子之庭乃相讓所爭地以爲閼原至今尙在注引地理志芮在臨晉者恐疎

然閼原在河東復與虞芮相接臨晉在河西同州非臨晉芮城明矣

周武王

年芮伯作旅巢命

按書序巢伯來朝芮伯作旅巢命

孔

巢殷之諸侯伯爵也南方

達國武王克商慕義來朝芮伯周同姓圻內之國爲卿大夫陳威德以命巢

成王三十七年召芮伯受顧命

按書經顧命四月甲子同召太保奭芮伯彤伯畢公衛侯毛公師

氏虎臣百尹御事受命

按康王之誥王出在應門之內太保率西方諸侯入應門左畢公率東方

諸侯入應門右皆布乘黃朱賓稱奉圭兼幣曰一二臣衛敢執壤奠皆再拜稽首王義嗣德答拜太保暨芮伯咸進相揖皆再拜稽首曰敢敬告天子皇天改大邦殷之命惟周文武誕受姜若克恤西土惟新陟王畢協賞罰勘定厥功用敷遺後人休今王敬之哉張皇六師無壞我高祖寡命

厲王三十年王以榮公爲卿士芮伯諫王 按詩經大雅苑彼桑柔其下侯甸將采其劉瘼此下民

不殄心憂倉兄填兮倬彼昊天寧不我矜四牡騤騤旃旌有翩亂生不夷靡國不泯民靡有黎具禍以燼於乎有哀國步斯頻國步蔑資天不我將靡所止疑云徂何往君子實維秉心無競誰生厲階至今爲梗憂心慙慙念我土宇我生不辰逢天憊怒自西徂東靡所定處多我覲瘠孔棘我圉爲謀爲毖亂況斯削告爾憂恤誨爾序爵誰能執熱逝不以濯其何能淑載胥及溺如彼遡風亦恐之僇民有肅心莽云不逮好是稼穡力民代食稼穡維寶代食維好天降喪亂滅我立王降此蠹賊稼穡卒瘁哀恫中國具贅卒荒靡有旅力以念穹蒼維此惠君民人所瞻秉心宣猶考慎其相維彼不順自獨倬臧自有肺腸俾民卒狂瞻彼中林荏荏其鹿朋友已譖不胥以穀人亦有言進退維谷維此聖人瞻言百里維彼愚人覆狂以喜匪言不能胡斯畏忌維此良人弗求弗迪維彼忍心是顧是復

民之貪亂盜爲荼毒大風有隧有空大谷維此良人作爲式穀維彼不順征以中圻大風有隧貪人敗類聽言則對誦言如醉匪用其良覆俾我悖嗟爾朋友予豈不知而作如彼飛蟲時亦弋獲旣之陰女反予來赫民之罔極職涼善背爲民不利如云不克民之回遘職競用力民之未戾職盜爲寇涼曰不可覆背善言雖曰匪予旣作爾歌

序
桑柔芮伯刺厲王也

按國語厲王說榮夷公芮良夫曰王室其將卑乎夫榮公好專利而不知大難夫利百物之所生也天地之所載也而或專之其害多矣天地百物皆將取焉胡可專也所怒甚多而不備大難以是教王王能久乎夫王人者將導利而布之上下者也使神人百物無不得其極猶日怵惕懼怨之來也故頌曰思文后稷克配彼天立我烝民莫匪爾極大雅曰陳錫載周是不布利而懼難乎故能載周以至於今今王學專利其可乎匹夫專利猶謂之盜王而行之其歸鮮矣榮公若用周必敗旣榮公爲卿士諸侯不享王流於彘按汲冢周書芮伯若曰予小臣良夫稽道謀告子惟民父母致厥道無遠不服無道左右臣妾乃違民歸于德德則民戴否則民讎茲言允効于前不遠商紂不道夏桀之虐肆我有家嗚呼惟爾天子嗣文武業惟爾執政小子同先王之臣昏行

闕

顧道王不若專利

作威佐亂進禍民將弗堪治亂信乎其行惟王暨爾執政小子攸聞古人求多聞以監戒不聞是惟弗知后除民害不惟民害害民乃非后惟其讎后作類后弗類民不知后惟其怨民至億兆后一而已寡不敵衆后其危哉嗚呼

闕三

如之今爾執政小子惟以貪諛爲事不懃德以備難下民胥怨財

單竭手足靡措弗堪戴上不其亂而以予小臣良夫觀天下有土之君厥德不遠罔有代德時爲王

之患其惟國人嗚呼惟爾執政朋友小子其惟洗爾心改爾行克憂往愆以保爾居爾乃臚禍翫哉

遂弗悛余未知王之所定矧乃

闕二

惟禍發於人之攸忽於人之攸輕

闕

不存焉變之攸伏爾執政

小子不圖善偷生苟安爵以賄成賢智箝口小人鼓舌逃害要利並得厥求唯曰哀哉我聞曰以言

取人人飾其言以行取人人竭其行飾言無庸竭行有成惟爾小子飾言事王實蕃有徒王貌受之

終弗獲用面相誣蒙及爾顛覆爾自謂有餘予謂爾弗足敬思以德備乃禍難難至而悔悔將安及

無曰予爲惟爾之禍

按通鑑前編厲王三十年以榮夷公爲卿士

桓王十一年芮伯出居於魏

按春秋不書

按左傳桓公三年芮伯萬之母芮姜惡芮伯之多寵

人也故逐之出居于魏

桓王十二年周師秦師執芮伯

按春秋不書

按左傳桓公四年冬王師秦師圍魏執芮伯以歸

桓王十七年秋芮伯會諸侯伐曲沃

按春秋不書

按左傳桓公九年秋虢仲芮伯梁伯荀侯賈

伯伐曲沃

虞

帝辛十四祀虞芮質成於周

按史記周本紀西伯陰行善諸侯皆來決平於是虞芮之人有獄不

能決乃如周入界耕者皆讓畔民俗皆讓長虞芮之人未見西伯皆慙相謂曰吾所爭周人所恥何往爲祇取辱耳遂還俱讓而去

注

地理志虞在河東太陽縣芮在馮翊臨晉縣正義曰括地志云

故虞城在陝州河北縣東北五十里虞山之上古虞國也故芮城縣西二十里古芮國也晉太康

地記云虞西百四十里有芮城括地志云又閼原在河北縣西六十五里詩云虞芮質厥成毛萇

云虞芮之君相與爭里久而不平乃相謂曰西伯仁人盍往質焉乃相與朝周二國君相謂曰我

等小人不可履君子之庭乃相讓所爭地以爲閼原至今尙在注引地理志芮在臨晉者恐疎然

閼原在河東復與虞芮相接臨晉在河西同州非臨晉芮城明矣